

摘藻堂四庫全書薈要

集部

欽定四庫全書薈要卷一萬六千九百二十三

集命

空同集卷三十二

明 李夢陽 撰

七言律四

小至

連年至日多暄暖不似今年暖更饒脈脈水泉元自動
微微雲物向人遙即防臘意傳梅蕊更遣風光媚柳條
便可抽身解簪組且謀春事伴漁樵

人日

翠篠娟娟暖不遲
含風雪壁迴多姿
煙霞弄色不忍見
梅柳爭春能幾時
返照高樓橫欲斂
宿雲孤樹靜難移
自傷消渴淹朱紱
不拜金花到玉墀

穀日

人日穀日俱不惡
悠悠天意豈難明
得時田畷休空喜
少雪螟蝗恐旋生
陶令柳陰元傍宅
邵平瓜地故依城
載歌行路思農隱
未信青山亦世情

丁卯小至

一冬為客負簷暄至日彤雲客思繁迎氣柳梅渾欲動
再開桃李更何言飛沙霧竹催寒景落日鄉關切斷猿
獨上高臺眺雲物不堪清淚灑中原

戊辰生日

生還淹跡倚荒廬懶散經秋賦索居雙淚弟兄揮酒日
寸心關隴望鄉餘臘晴抑日輝輝動春逼冰河滾滾虛
三十七年吾底事彈歌不為食無魚

臘日

夷梁臘日春意動物色生態誰能禁歸煙霏霏捎竹勁
融雪細細生苔深腐儒奔走竟何事鄉土棲遲多苦心
便欲乘閒買越舸青春發興好南尋

九日繁臺二首

窮秋避地魚逢節曠野無山且上臺江漢鴈驚翻北叫
太行河斷却東來羈栖歎世深難醉病起思鄉老易催
閏月有期還發興菊花晚暮莫愁開

其二

禹廟登高人盡迴
儒宮下馬盡殘杯
奔陳孔甲元孤憤
去趙虞卿且未哀
高葉下風還抱石
片雲拖雨故臨臺
酒闌却憶十年事
半醉呼鷹向此來

己巳守歲

窮年豈辦椒花頌
守歲真貪竹葉杯
天下風塵難卽料
夜中星斗直須迴
傷心蜀漢新戎馬
觸目中原半草萊
飲罷空庭聊獨立
五更春角動城哀

辛未元夕雪後

干戈西北塵雖靜，寇盜東南檄尚飛。
歎世酒杯難自強，競時燈火況多違。
春偷草閣梅初放，雪舞隄城柳未歸。
三白農人懽荷笠，萬年天子願垂衣。

初度懷玉山有感

年今四十身千里，生日登臨寓此中。
憂國未收南望淚，思家猶阻北來鴻。
寒冬白霧峰巒隱，車馬深山道路通。
學海久傷青鬢改，振衣真愧玉巖風。

盱江小至

建昌冬至益王宮劔珮趨朝禮半同萬里龍顏貪想像
十年霜鬢歛西東臘偷江嶠梅先泄春逼關河鴈已通
雲物不遮鄉國月麻姑今擬暫停驄

九日衙齋對酒偶作

故鄉叢菊歎離居客邸秋梅葉且舒四海重陽三滯酒
兩河歸鴈幾傳書拂衣欲就淵明里短髮猶驅孟博車
意遠遲回聊復酌浮雲北望佇踟蹰

南康元夕

發春南地北同寒旅宿張燈雪氣殘
三晉樓臺違夜月
五湖鷗鷺伴風湍真防柳色侵梅色
莫道蟬冠勝鷓冠
匣劍衝星愁易泄倚筇還向斗牛看

楚山九日太華君同登

登高此日吾惟汝把酒他年憶菊時
酒劇江山聊自放
菊深風雨為誰遲
謾於孔樂傷王賦莫遣將歸學宋悲
轉眼干戈西北異楚雲回首任支離

登高以雨留山寺

鐘鼓高城夜到山，醉留真愛石堂閒。
傍龕燈伴吟猿宿，度澗風吹急雨還。
來笑菊花供老鬢，卧愁雲霧滿人寰。
朝晴更擬諸峰賞，萬仞丹梯合共攀。

乙亥元日東臺省何邊二使君邊病卧久

煙和日翠且重樓，洶洶綺羅悲此州。
碧草可容漳浦卧，官梅真憶廣陵遊。
來鴻去燕催今昔，柏葉薇花阻應酬。
興發春山能約往，冰開仙楫擬乘流。

乙亥元夕憶舊東邊子卧病不會

憶昔金錢並卜歡稱心燈火獨長安鑪香欲散尚書省
環珮先歸太乙壇十載酒杯喧五夜九衢遊馬閱千官

蓬將轉合今同此月滿梁園却自看

邊舊太常故
曰太乙壇

丙子冬至

奉天門下玉闌橋此日催班早侍朝占史奏雲懽萬國
太官傳宴散層霄苑梅迎律春先動宮柳臨風色欲搖
一出忽今驚十載百年勲業有漁樵

丙子生日答田生

當時結客少年場走馬看花紫陌香
三黜偶然齊柳惠
兩朝奚但有馮唐壽杯今夕余同醉
獻賦開春爾一方
京國逢人問衰健為言吾鬢已蒼蒼

除夕寫懷呈毛使君

晝日淒淒風色嚴晚登雲閣漫開簾
山河不逐年華改
天地空悲老鬢添隨俗香燈消燭夜
近人星斗下虛簷
微吟暗憶乘驄使綵筆迎春幾自拈

元夕宴王孫第

向夕虛廊風自驚，啟筵華月坐留情。
琴樓合與衣冠客，鐙榭遙聞歌吹聲。
吟劇晚梅聊索笑，醉移寒竹互尋盟。
九衢遮莫催車馬，願倒王孫百甕清。

丁丑除夕

明朝行年四十七，默憶宦游年盛時。
帝京守歲朋輩集，除夜開堂酒隨綵筆迎春誰。
競長白頭懷舊獨含悲，乘陽莫謂渾無事。
冰泮黃河起釣絲。

戊寅立春庭前桃樹二首

冬殘月閏豫看春暖氣晴陽應節新老大徒懷爰背獻
艱危竊慮轉蓬身下除飢鵲爭噓雪出穴微蜂特傍人
獨立桃叢憶桃日武陵今有泛花津

其二

春日題春試彩毫高門傳菜玉盤高乍看旭日輝山檻
不分時風向砌桃虎豹雲移思霧雨魚龍冰動遲雷濤
物情且共天流轉人世誰曾免二毛

戊寅元日

閏臘逢元晷自長乍晴暄日攢年芳當階雪浥桃枝透
隔戶風傳竹氣香籠內乾坤吾獨放鏡中勲業鬢先蒼
北游春色隨龍輦生意何由即萬方

小至喜康狀元弟河路過齋其兄書見示

侵曉書雲雲四生向昏濛雨散孤城敲門怪爾關西使
馬緣誰淮上行板柳弄梅今日事望鄉懷友百年情
傳言且共陽回喜天意分明欲太平

九月七日夜集

此夜邀賓過草堂，實因佳節重壺觴。
時侵叵奈鐙前菊，老去誰拋鏡裏霜。
草暗微寒催蟋蟀，雲開片月下滄浪。
明朝好趁登高伴，木落天空望帝鄉。

冬至前一日雪集

遽看風雪催長至，旋具盤飧款近賓。
片片窺簾如避酒，霏霏點袂却隨人。
臺寒預發書雲興，梅動猶潛隔夜春。
醉裏白頭堪北望，陽回黃屋且西巡。

己卯立春

律窮寒極有今日斗轉天迴還此春雪擁竹根旋自濕
風來人面霎堪親曾游舟楫思南國未返旌旗望北辰
漫惜物華番覆醖幾揮生菜欲沾巾

庚辰元日

今日何日陰霏霏看之不見濡人衣層冰滿眼祇突兀
白日何處能光輝單于祭馬春欲動漢皇射蛟南未歸
傳到揚州好花月鳳簫應伴五雲飛

元夕

千年爛漫鰲山地少小看燈忽二毛
兵後忍聞新樂曲
月前真愧舊宮袍
南州樓閣煙花起
北極風雲嶂塞高
悵望碧天聊獨立
夜闌車馬尚滔滔

立春前一日雪東黃子

春前白雪紛紛至
落地欲消還未消
明日立春應五出
晚來微月尚爭飄
梅花故傍袁安室
柳色潛回鄭祭橋
聞道郢人能妙曲
曲成吾品赤鸞簫

辛巳立春

冬晴轉覺冰霜厲日散俄還海嶽春
綵勝恩光曾侍帝菜盤風俗謾隨人
雪融樓閣沾沾薄煙動松筠裊裊新
人壽幾何吾半百到脣杯酒莫辭頻

辛巳元日

倏忽吾生五十春兩朝遺佚太平身
望鄉心逐關雲起懷國情將汴柳新
自信右軍非墨客王右軍五誰言高

十書始成

適是詩人

適年五
十始詩

南征昨報龍旗返佇想嵩呼動紫宸

辛巳生日

吾今五十頭半霜大兒已壯孫已長力田頗自識草木
出門每與憂豺狼風晴野水白晶晶臘近山日寒蒼蒼
但能草澤射猛虎豈須熊館誇長揚

辛巳除夕遇立春

改元明日初開歷除夕今年暗入春天地漸分三極色
行藏已半百年身和煙浥浥梅應劇滴露蕭蕭竹未勻
喧歲不知宵遽曙北雲何處望楓宸

壬午元日

元年元日光華異青帝青陽左个開北斗不將天地轉
春風那使萬方回蛟龍窟宅寒猶閉鴻鴈雲霄暖自來
回首玉顏慚大藥許身元擬是仙胎

癸未除夕

連冰累雪欺年暮除歲嚴風放夜晴挂斗拖星猶凍色
趨鐘催鼓遽春聲喧城車馬朝元客戰野旌旗禦寇兵
人事物華應遂轉燭堂深坐獨含情

丙戌九日

百年佳節今風雨
數日東籬已菊花
老鬢不緣吹帽短
濕枝何事向尊斜
紛披九徑憐揚子
潦倒三杯笑孟嘉
欲補登高望晴色
晚來紅氣有雲霞

九日浦江王水亭共泛二首

長蘆古陂城一偏
樓臺波水秋相鮮
紫萸黃菊有今日
翠管銀箏須此筵
微風改席徐回纜
落日留賓更進船
漫說龍山能落帽
何如李郭共登仙

其二

君王別館湖中央，菊日浮游錦纜香。
貪把深杯向蘆葦，錯教橫吹驚鴛鴦。
車徒雜沓四岸合，殿閣迴沿一水長。
萬古有人同此地，他年吾輩是重陽。

憶西南陂九日之泛

一游水亭心自牽，沙色湖風常眼前。
蕩搖每疑菊在把，出沒似有鷗隨船。
冥冥浦溆幾落日，蒼蒼蘆葦時遠天。
頻來此地亦可借，恨無好詩酬紫煙。

再約陂泛屬風雨阻

自游此陂秋每晴再約寧知風夜驚紛披已詫黃葦亂
吞吐能禁白浪生朝來霧雨細細動時有鴻鴈嘈嘈鳴
但問舟航今好在無愁天地無開明

九月晦日西南陂再泛二首

水國窮秋霽更寒渚宮重宴菊猶殘閒身欲住張融舸
短髮羞欹杜甫冠日映樓臺天上過風恬魚鳥鏡中看
綠池莫戀團團竹即擬枚乘賦不難

其二

水上冬初多白雲沙間煙滿白鷗羣
經添雨雪湖非減刈盡蕪葭路轉分
當岸女牆晴倒出傍船木葉醉偏間
迴途恐觸蛟龍蟄莫遣鳴笳徹暮曛

辛巳九日田子要東坡之遊雨弗克赴

今秋霖雨何連綿佳日阻放東坡船
衰年實怯白頭浪朋游忍負黃花天
城陰來往戲羣鷺寺門從橫鳴亂泉
閒看靜聽誰共汝浙瀝晚暝松林煙

其二

昨來晴立寺南丘，城水湖雲向客流。
夕陽欲低鐘磬閣，隔岸忽聞簫鼓舟。
動興帆檣真為節，阻人風雨故禁秋。
當籬藥菊披披艷，獨嗅孤吟迴自愁。

其三

衝泥杜甫吟愁雨，落帽叅軍醉倚風。
雲水無緣雙放舸，蘆葭何意獨鳴鴻。
清沙錦纜相期地，白首黃花轉望中。
借問臨高把杯酒，幾層湖閣坐秋空。

無事

無事日長春但眠水昏野暗風常顛繁葩亂葉眼欲盡
乳燕啼鶯心自憐匣中幸猶有雙劍杖頭奈可無百錢
人生幾何忽已老激昂淚下如流泉

東園夏集

水館風林夏日宜野天晴色曠襟期舊馴麋鹿呦呦切
新集鳧鷖泛泛遊穿徑獨蜂猶覓菜倚牆餘杏漫留枝
蟬鳴鳥亂從渠暮把酒看雲是我時

霖雨洶湧城市簿笈而行我廬高墉尚苦崩塌
何況黃子住居湫隘詩以問之

前日頻雨無完牆今番如注誰禁當田廬城屋盡漂沒
驕雲驚霧還飛揚恒飢烏鴉只自噪滿意蒿藿如人長
辭宅頗怪晏嬰子卜居何必青泥坊

晏子宅近市湫隘
景公徙之晏子不

從杜詩飯煮
青泥坊底芹

正月望日繁臺寺集

臘凍雲黃海岳愁春青白日快吾游陰坡氣觸娟娟雪

暖澤冰分細細流
晨起探梅穿野寺
晚來移席傍鐘樓
無端四望風煙起
燈火煌煌滿汴州

夏日余園

夏日深林喧乳鴉
名園游客散平沙
百年事業真杯酒
四海朝廷正一家
隊隊自來循檻蝶
番番相學後春花
黃雲薄暮休驚眼
白首吾生信有涯

田居喜雨

有田憂水復憂乾
一雨農心得暫寬
從此荷鋤添野事

向來垂釣省風湍
臺林澤草俱回態
急響微沾並作寒
薄暮斷虹收霹靂
曠原西日倚筇看

秋遲

秋遲月閏菊無花
景短天昏日易斜
山峻幾時藏虎豹
海枯他日見龍蛇
行藏且付杯中物
潦倒新添鏡裏華
盜賊闖南今定否
暮雲哀角起三巴

獨上

獨上高樓生夕煙
帝畿冬望轉淒然
西山雨雪留殘景

北海風塵接暮天，只為浮名傷遠道。
況逢寒日下長川，江梅岸柳年年發。
菊徑茅堂亦可憐。

臺寺夏日

古臺高並鬱嵒荒，斷塔稜層鎖寂寥。
積雪洞門常慘慘，熱天松柏轉蕭蕭。
雲雷畫壁丹青壯，神鬼虛堂世代遙。
惆悵宋宮偏泯滅，二靈哀怨不堪招。

于少保廟

朱仙遺廟已沾衣，少保新宮淚復揮。
金匱山河丹券在

玉門天地翠華歸平城豈合留高祖秦相何緣怨岳飛
最怪白頭梁父老哭栽松柏漸成圍

朱仙鎮

水廟飛沙白日陰古墩殘樹濁河深金牌痛哭班師地
鐵馬驅馳報主心入夜松杉雙鷺宿有時風雨一龍吟
經行墨客還詞賦南北淒涼自古今

春日謁三皇廟

爰從開闢無三聖蠢爾生民豈至今寂寞廟宮誰下馬

遲迴天地獨沾襟
紫堦藥蔓還春色
搖日叢菁已暮陰
悵望龍鬚心更苦
白雲偏繫鼎湖心

吹臺春日古懷

廢苑迢迢入草萊
百年懷古一登臺
天留李杜詩篇在
地歷金元戰陣來
流水浸城隨柳盡
行宮為寺汴花開
白頭吟望黃鸝暮
瓠子歌殘無限哀

自關西回展外舅大夫之墓用前韻

遙阡無計掃春萊
絮酒何因到夜臺
西客兩年和淚到

北風千里共愁來
田園樹大身先葬
書畫樓成畫不開
歿後外孫今五尺
百年遺恨使人哀

狄梁公寧州有廟

狄相昔為州刺史
于今伏臘土人思
向來伊水瞻遺墓
此處羌民拜古祠
鸚鵡夢中天地轉
太行山上旆旌遲
稔知忠孝平生事
更讀希文萬古碑

靈武臺

環縣城邊靈武臺
肅宗曾此辟蒿萊
二儀高下皇輿建

三極西南玉璽來衣白山人經國計朔方孤將出羣才
可憐一代風雲際不勸君王駕鶴迴

冬日象山書院

草疎葉黃沙出溪日高南崦氣淒淒人亡故國還祠廟
世異陰崖尚品題鳥雀石林迎旆散野狐風草怒人啼
昔賢名跡誰堪此兩淚遙傷萬仞梯

其二

曉岸霜林出並驄冬晴丹壑自含風遺祠俎豆攀緣日

往事荆榛想像中
半凍巖泉和雨斷
實連山谷暗雲通
寒蘿更洗磨崖讀
迴立徘徊落葉紅

秋望

黃河水遶漢宮牆
河上秋風鴈幾行
客子過壕追野馬
將軍韜箭射天狼
黃塵古渡迷飛輓
白月橫空冷戰場
聞道朔方多勇略
只今誰是郭汾陽

空同集卷三十二



總校官庶吉士臣侍朝

校對官編修臣閔惇大

謄錄監生臣吳錫綵

欽定四庫全書薈要

集部

空同集卷三十五

三五

詳校官候補通奇繼應臣郭祚熾



欽定四庫全書蒼要卷一萬六千九百二十四

集部

空同集卷三十三

明 李夢陽 撰

七言律五

潼關

咸東天險設重關
閃日旌旗虎豹閒
隘地黃河吞渭水
炎天白雪壓秦山
舊京想像千官入
餘恨逡巡六國還
眼滿非無棄繻者
寄言軍吏莫嗔顏

題雲臺觀

雲臺觀枕玉泉湄翠削三峰對不移窓裏山光時隱見
晚來雲氣壁淋漓醮辰絳節朝羣帝天路金童引鳳螭
頭白掃門憐弟子斲松石礙白苓滋

榆林城

旌干嫋嫋動城隅十萬連營祇為胡不見坐銷青海箭
盡言能挽繡螭弧白金獸錦非難錫鐵券貂璫莫浪圖
昨夜照天傳砲火過河新駐五單于

出塞

黃河白草莽蕭蕭青海銀州殺氣遙
關塞豈無秦日月將軍獨數漢嫖姚
往來飲馬時尋窟弓箭行人日在腰
晨發靈州更西望賀蘭千嶂果雲霄

武昌

武昌城北大江流沱水夾城鸚鵡洲
楚蜀帆檣風欲趁蛟龍濤浪暮堪愁
青煙自沒漢陽郭新月故懸黃鶴樓
無限往來傷赤壁三分輕重本荊州

江行

江行日日隨風雨，日日迎風帆。
不懸頗怪蛟龍懼，出沒更兼鷗鷺劇。
連翩窓開浙浙琴書濕，岸轉冥冥竹纜牽。
迴合萬山心目破，撇漩誰忍向湖煙。

泛湖

匡廬彭蠡曲相連，伐鼓蠻歌趁進船。
屏見雲橫石壁淨，鏡開日破浪花圓。
漁樵山澤堪時給，盜賊干戈枉自纏。
遣帥已添新節制，指揮行見掃風煙。

南溪秋泛三首

聞說南溪徑尺魚漁人何事網常虛魚行碧葦深先見
網入寒潭迴不舒東舍刈禾搖夕浦西隣決水溜秋渠
平生肉食憂空切此日臨淵意有餘

其二

乍見鷓鴣立釣磯還驚翡翠掠波飛汀葭晚宿濛濛霧
野竹晴含宛宛暉謝傅未忘舟楫興楚臣空戀芰荷衣
蒼茫水落雲泥靜悵望林翁却自歸

其三

却向林亭觀水磴暫移沙舸躡雲堆奔湍迅轂元相激
石竇桐標故不推旋影動搖波底日斷聲吹轉地中雷
何人解識機心事後世徒矜造化才

遊西山歸呈熊御史卓

高閣開襟生遠興西山當眼更分明酒邊花樹三春暗
湖上風林盡日清憶昨並穿巖洞入只今疑繞薜蘿行
浮生擾擾非吾意去鳥悠悠空世情

出輝縣城望石門山其上有仙潭玉鯉

明星欲落開縣城千峰萬峰初雪晴源泉亂石涓涓溢
削壁孤雲裊裊生估客深穿猛虎窟樵夫習傍翠巖行
仙門屹立三潭水玉鯉空懸一線情

盤山道中作

磴道晴雲雪草春石門丹壁鬪嶙峋聞雷不羨蛟龍起
避地翻將虎豹隣少室山人虛索價壺關三老實藏珍
煙花白日經行處鴻鴈冥冥歎此身

遊上方寺晚登鐘樓

東北叢林冠此都地分清寂聚僧徒青天寶塔還今古
赤日珠光乍有無草徑鷺乾時獨立松林鶴並晚相呼
登樓更見河流急歎世因悲馬負圖

王孟寺北望

在郾城縣南

暑路塵沙淹客心晚原臺榭慰登臨西山日抱重簷落
汝水雲移畫棟陰盜賊兩河猶轉戰朝廷萬載莫輕侵
懷芹欲獻江湖遠北望徒傷北極深

賢隱寺

在信陽州

谷寺鳴鐘午未深
耽幽特與伴相尋
行穿樹杪樓臺見
坐傍山腰紫翠沉
獨響澗泉傳石竇
並飛梁燕入松陰
徘徊自笑三江客
佇望誰知萬里心

開先寺

讀書臺倚鶴鳴峰
迴合千山翠萬重
白晝懸泉喧霹靂
清秋雙劍削芙蓉
撐持古寺還雲閣
寂寞前朝自暮鐘
瑤草石壇應不死
興來真欲跨飛龍

瀑壑晚坐

醉踏匡山晚未遲，翠巖丹壑凜秋姿。
峰高瀑布天齊落，峽靜星河夜倒垂。
遠害欲尋麋鹿伴，暫羈終與世人辭。
摩崖徧剔蒼苔讀，獨坐雲松有所思。

五面石

貴溪

東華山北五面石，削成五面何嶙峋。
崩崖鼠餐何代雪，陰洞苔滋千古春。
映日閃閃上雲氣，步天渺渺昇仙真。
草衣木食亦吾志，放浪胡為羈此身。

東華山贈友

午時叱馭踰重險薄暮捫蘿到絕巔四海風煙落日外
萬山閩越酒杯前劇傷嶺谷旌旗滿暗憶家園道路偏
自古有人同戮力吾曹須擬太平年

龜峰寺

弋陽縣南山下寺三十二峰羅列竒最愛紫煙生石鼎
絕憐青嶂削靈芝峭崖哀壑還人世古往今來自鬢絲
已遣野場維玉騎合留崖月照金卮

石鼎靈芝
並峰名

別龜峰

江上龜峰天下稀，挈朋貪賞夜忘歸。
冠裳他日思丹壑，車馬平明發翠微。
歸路竹蘿偏拂幘，出山雲氣故隨衣。
杳然一笑憐踪跡，自不投簪願孰違。

鉛山石井

吁嗟此巖太竒古，雲牙石乳相拄撐。
碧泉中洞晝亦黯，青草倒垂冬尚生。
即令入海信誰遏，祇怪出山常底清。
擬促桑柘會欲落，猗此可濯慙我纓。

鉛山陸趨宿南巖寺

北風越南山木稀關西宦子常念歸遠烟漠漠谷日暝
前路迴迴冬燒微村春水旋疾徐應灘鴈夜驚高下飛
鐘鳴騎合巖寺近松火竹深開石扉

自新喻馬赴新淦方等寺晚飯

趨塗暝雨已忽霽入寺晚飯鳥將栖仲夏稻苗特裊裊
黃昏松桂何淒淒流年遠村換物色曠野青天悲鼓鼙
峩峩百丈屹在眼策馬欲攀交虎蹄

百丈山有
范梈山房

快閣登眺

江上冥冥風浪生
閣中清眺會儒英
野舟冒險只自渡
汀鳥避人時一鳴
四海登臨吾白髮
萬山迴合此孤城
劇談轉切憂時念
日暮浮雲況北征

麻姑山

冒險探深雲霧收
麻姑山水冠南州
潭深自激風雷黑
谷迴誰羣鹿豕游
仙女石壇殘欲沒
魯公碑版斷仍留
可憐踪跡俱塵土
兩瀑雲霄萬古流

題玄壇觀

江行晝靜便清暑水口山竒鎖吉安豈為天生饒怪石
遂令人擬築玄壇潭渦地轉常年黑樓閣崖懸五月寒
風牖把杯聊暫倚海蒸雲起故須看

將至安仁

安仁古岸又河濱細柳濃煙密弄春花發北山翻盜賊
眼昏南國且風塵盤渦浴鷺緣誰喜下瀨雙帆他自親
破浪會看風萬里采薇應許畀間身

看廬嶽

春時看嶽落星洲夏來看嶽復江州獨行稔負煙霞伴
久住非貪麋鹿遊石室丹書吾異世錦屏雙劍晚遮樓
登尋擬縱涼天目一葉飄飄江漢流

錦屏雙劍
並峰名

楚望望襄中形勢

楚望峰頭望楚雲遙憐紫蓋紫陽君廬荒不斷盤龍氣
碑滅猶存墮淚文地轉江淮浮遠成木同巴峽塹雄軍
里名冠蓋非吾事願訪鹿門麋鹿羣

繁臺雨望和田生

感事逢時恨不稀
水城寒食半花飛
青郊白馬朝誰並

細雨輕帆晚自歸
何計上賓留鳳馭

是時有孝貞皇太后之喪

無書

北狩挽龍旗

是時帝在宣府

層臺獨上休翹首
牢落江州易濕

衣

大梁城東南角樓

城樓占角分孤峻
野色生煙合杳冥
華夏亦為元社稷
古丘曾是宋朝廷
直看紫極雲霾壯
背觸黃河風浪腥

日暮馮軒益愁思夷門今有少微星

晚過禹廟之臺

暮行羣過禹王宮
瑟颺松林靜入風
步競石梯秋獨健
眼收沙海月還空
聲名北上青驄客
潦倒中原白髮翁
杯酒重傷分手地
古今踪跡本飛鴻

題黃公東莊草堂

草色通門柳覆牆
繞堂新雨足時芳
晴郊客過沾猶濕
春晝人間覺更長
拚引滿杯聽鳥哢
願留餘醞待花香

休誇水際魚山際且醉松傍與竹傍

少林寺

林深谷暝客子入鐘鳴葉落秋山空
煙雲細裊石澗底巒岫亂積松窓中
唐碑漢碣蘚字剥虎啼猿嘯蘿燈紅
獨坐悠悠息塵想少室影下月出東

望少林次韻

三十六峰雲氣通何峰寺西何者東
林巖霜橫遠亦靜煙嵐日破重還空
千山盡歷暮轉碧一樹不落秋能紅

漸聞鐘聲出杳靄得路誰憐馬僕功

宿少林次韻

萬山微暝一鐘鳴古寺深秋倦客情僧本折蘆翻面壁
人非騎鶴故吹笙寒催亂木風交響白動虛巖月自生
慚愧勞勞不成寐丁丁卧聽早樵聲

暑日過雪臺子園莊

蟬聲樹色村村似一坐君亭日每斜靜裏柴門惟燕雀
老來尊酒是桑麻年豐隣里家家麥時至園林處處花

苦熱只今憂赤土幾時龍起沛天涯

城東陂秋泛

返照孤城落木中畫船秋水坐來空影涵樓閣人齊過
香引蕙葭路轉通雲氣襲樽溫復冷笛聲將拖北還東
不須預問天邊月波上餘霞閃閃紅

立夏後晴遊我莊

郊出不知昨夜雨日高煙翠濕空林楊花欲盡村村雪
梅子先傳樹樹金笑向市城開俗眼喜從園野見吾心

繞亭奚啻千竿竹夏日黃鸝更好音

徐將軍園亭

將軍別墅今停馬五月塘池蓮半紅舉眼江山惟赤日
快人樓閣自涼風穿林竹翠沾衣滿布席葵香撲酒空
平世主人虛抱武醉來誇挽六鈞弓

清明下糧廳題杏花

清明著處花爭發一樹庭前爾獨遲不為炎天能結實
豈應官署許生枝桃蹊李徑雖多寵撲酒飛簾自一時

已辦青錢貪酩酊合教紅蕾赴深期

柑至

丹橘黃柑世所珍年年隨貢走風塵內廷賜出人人羨
近市收來顆顆勻翻訝久藏香不逸迴疑初摘蒂猶新
金盤玉箸真誰事寂寞文園自病身

菊

世上虛名白髮悲霜前幽壑迴春姿閒巡獨對真憐汝
醉折寒花欲贈誰官舍野堂渾一色冷風淒露漫相欺

高年漸覺馨香遠
萬里徒傷酒一卮

牡丹盛開羣友來看

吾家何處牡丹園
揚子岡西古宋原
忽有芳菲妍岸閣
豈期車馬駐江村
憐香實怕青蘿掩
在野虛愁蔓草繁
碧草春風筵席罷
何人道有國花存

冬至菊

至日貪看九日花
弄霜吞雪轉宜誇
思將正色留天地
肯使陰陽管歲華
寒蒂已包重放萼
暖根應抱更生芽

書雲莫誤禎祥奏斗酒東籬自有家

王左史宅賞冬菊

菊筵元向春前約共憶霜黃薄牡丹冬日此逢香欲暖
夜堂偏醉色終寒閒居四海嗟吾賞晚歲三杯稱爾官
疎影獨枝看轉劇好添華燭近高闌

乙亥春郊圃牡丹盛開聿余離茲倏爾四載實
凡時藝成功約客往賞屬雨發詠焉

牡丹元種無多本別久叢分鬱映杯穠劇祇宜鷓鴣戲

品增疑傍棣花開
支離野圃羣葩掩
杏裊春庭細雨來
高會主賓忻並健
衝泥車馬莫空回

人有送牡丹花至者與客同賦

大梁城郭萬人家
大半朱門競此花
不為國姿寧用折
翫傳賓手轉須嗟
雙牽戲蝶臨書牖
獨惹遊絲撲釣槎
我亦有園新植此
往來無倦出城車

牡丹賞歸東邊王二子

非因絕代專芳品
豈復郊園守後時
夜靜雨姿應更劇

野寒風蕊莫頻吹空齋獨憶香仍滿晴日重尋路不遲
肯擬飛觴留健筆願攀驄馬護高枝

霖淫想郊園牡丹

園途雨濘花逢阻倚杖流雲灑北郊縱使彩煙偏國本
豈逾清露足春梢卷心暗蕊須時苦綠濕紅沾任俗拋
傳道魏緋纍滿眼傍株今可結遊庖

郊園餞御史許君屬牡丹盛開

曠圃風郊爾獨開國香仙色敢辭猜若先桃李名應減

縱隔城池客自來，穠壓野欄張燕待。餞臨官路挽驄陪，
萬鬚千萼非容易。忍遣臺霜近酒杯。

晚移席草堂再贈許君

晚坐移花酒並移，几鐙窓月轉春姿。情真解纜爭侵夜，
意不憐香豈盡卮。洶洶野風喧樹惱，冥冥波浪去途疑。
亦知仙種貪行豸，醉聽隣雞是別期。

王左史宅賞牡丹

槐庭絃管稱春筵，草圃繁華近暮天。老為名花扳自放，

醉逢國色轉須憐
娟娟影靜金尊裏
冉冉香回玉笛前
莫問平章舊時宅
沈香亭已入荒煙

郊園牡丹復花客往

問主尋芳客故來
百花開盡此花開
淒涼野徑堪車馬
爛漫天香只草萊
穿葉自由蜂逐逐
坐枝頻起燕迴迴
楊花暮合風沙迴
繞樹猶傾醉後杯

夏日盆荷階葵花數率爾成句

候及名叢每自芳
物華清暑倍年光
出波翠蓋枝枝靜

入院丹心朵朵香向日豈期回俗眼折筒聊得洗詩腸
不應種近榴花奪繞檻巡池淚數行

山行見梅

長至山行梅不遲攀條觸雨益垂垂雲暗野橋真獨見
歲寒蜂蝶敢相欺時心已抱調羹實久色難銷傲雪姿
愁在不緣鄉國亂白頭心事本同期

谷園二月梅集

江南梅花苦繁劇江北有梅花不肥春枝已矜雪後媚

玉蘂即妨風處稀
金尊綺席不時賞
快馬輕車堪夜歸
遙憶暗香月色動
莫令遽掩東園扉

梅下限韻作

聞說仙芳每避凡
託根長傍竹松巖
那期野圃深隨酒
可奈風花細撲衫
斜日席移春欲透
步叢香起雪猶銜
歲寒朋舊今何處
徙倚裁書手自緘

賞歸憶谷園梅

臨梅真惜先開蘂
後蘂吾歸應更繁
藉草無愁細細落

有蜂只恐垂垂翻折曾爛漫春攜袖醉記扶疎月坐園
已覺時心向桃李肯緣孤潔重迴軒

詠蟬

秋來雨多涼氣深寂寞寒蟬愁暮陰幸值開晴方聽汝
不緣清切轉關心故逾叢棘沾沾入却傍高槐細細吟
曹賦僅能推感激駱詩徒亦擬同音

和清明後見燕

坐棟穿簾爾亦驚紛紛紅紫徧春城羣衝海霧寒應阻

對語堂花暖却明去住溪山他日夢主賓天地世人情
卽論遲暮心難已切恐差池恨轉生

秋日覩白雲生率爾遣興

天際遊雲白裊裊渭陽羈客淚縱橫搏風弄雨有誰見
木落秋高堪自行變幻樓臺翻有態突然龍豹轉須驚
老夫趣此欲登望怪爾輕遮翡翠城

和李大隔牆見余家海棠次其韻

種汝深愁樹不長數年今遽出吾牆臨衢幸不矜全色

隔院應難掩暗香敢向紛紛爭俗眼私憐裊裊壓時粧
臙脂強半喧蜂少倘過同傾花下觴

同雙溪方伯詠石几

栗栗天生白石几癯癯日伴白頭翁清尊淹留不斷客
灌木陰森常自風看處遽浮金玉色移來深仗鬼神功
茲須小物君堪醉取致嵩山萬翠中

再賦

確然片石我之几置之堂邊樓在東蔥芊海棠上重綠

絢爛盆榴旁小紅性含煙霞不減色光敵玉金常吐虹
老夫有時醉凭汝扣之高歌天暮風

詠陶臺使蘭陽公解五色葵花

炎天小縣葵葵好五色空庭日日香開正得時須讓赤
見宜尊禮莫欺黃交枝接葉誰為衆異葉同心自向陽
此物煩君獻天子上林閒地草蒼茫

詠餅中柏限韻

愛汝側葉寒能青插之銅餅依石屏畫屯雲氣果不俗

夜飛光芒疑有靈森聳似學鸞鳳翼屈曲已具虬龍形
更欲移栽萬仞嶺待與松桂凌冥冥

為崔後渠詠棗竹亭

崔家孤亭萬竹裏繞牕栗栗青琅玕結實當春鳳不餒
託根有地龍且蟠霜風飄蕭起空谷美人翠袖生暮寒
彼淇盈盈一水隔望而不見徒自歎

哭王舍人昇

金門鐘動會千官野老騎驢戴鶻冠走問常州王內舍

昨朝客死漢長安
悄然門巷賓朋絕
遙遶家鄉行路難
即使過君終挂劍
肯令捫腹竟回鞍

哭亡友范副使淵其族孫進士永鑾寄其絕筆

詩到

憶在先朝侍聖顏
珮聲齊散紫宸班
傷心畫省分官地
並馬西湖舊看山
絕命祇傳詞爛漫
窺身誰述路間關
江門墓近湘流咽
拱木黃昏鳥雀還

有哀

漢陰丈人甘灌園海上漁翁非避喧
零亂春鷗橫夕浦
萋迷煙草入秋原
祇將華髮悲人世
不使黃金怨子孫
思向桂山歌偃蹇
月明天碧況聞猿

空同集卷三十三

欽定四庫全書薈要卷一萬六千九百二十五

集部

空同集卷三十四

明 李夢陽 撰

五言絕句

神京樂

薊谷襟東海居庸鎖北門王者本無外天險壯乾坤

其二

天回金氣合星順玉衡平雲生翡翠殿日麗鳳凰城

其三

鐘鳴長樂館樂奏未央宮壽域皇圖迥鉤陳紫極通

其四

衛霍干城舊伊夔鼎鼐新萬年天子壽四海一家春

望南城

南內夕煙斂玉樓春望空禁籞年年鎖園禽巢殿中

晚出禁闈

楊柳南城道芙蓉小苑通內使來調馬君王勅射熊

其二

夾城雲氣夕露掌
隱金盤楊花白雪亂
風起滿長安

東華門偶述

銀甕爛生光盤龍繡
袂香但知從內出不省
賜何王

采蓮曲

白鷺青天映紅粧
綠水遙笑語荷花裏
爭蕩木蘭橈

大堤曲

臘月大堤邊春風思
宛然楊枝搖白日煙
色裊金鞭

豔曲

盈盈綺閣女生長不知春
開窓見百結背面掩羅巾

其二

父母愛少女女是聰明
子生不識鴛鴦繡出鴛鴦是

春曲

春風度山閣凭軒望江路
簾動時有香不見花開處

其二

翩翩誰家燕銜泥向何所
避人花叢裏忽復梁間語

楊白花

三月大路旁綠楊弄芳春可憐
雪白花來往送行人

其二

寧唱采菱曲休歌楊白花
菱生猶有蒂花去落誰家

相和歌

美人羅帶長風吹不到地
低頭采玉簪頭上玉簪墜

月夜吟

月出東方高刺刺燈下語
漂搖林中籜浙浙如寒雨

九月見花

長安桃李樹秋晚復花枝
九陌寒煙裏無風自落時

聞笛

白日挂雲間誰家玉笛閒
北風吹楊柳落葉滿關山

曙

城雲白欲曙沙月上猶殘
獨步憐紅葉空庭玉露團

望浦煙

客愁何處落滌滌冬浦煙
日出浦煙歇客愁還復然

九日京中

白雁獨橫秋黃花伴醉遊
眼看風物換愁殺仲宣樓

正月見雁

憶昨辭京邑相隨南雁歸
如何早春日獨見北鴻飛

出郭

出郭携尊屢尋園步屨遲
莫嫌春事晚猶是百花時

野望

夕靜山容斂秋凝野色淒
白雲留絕巘蒼霧隔前溪

晚出大堤姪葉來迓

裊裊綠楊西雙翻碧玉蹄何由識小阮為聽紫駟嘶

石頭口竹飲

白日竹林中隕然脫巾醉風吹亂葉響醒看江日墜

南康元日

此日故鄉酒應憐千里遠是處萋萋草王孫歸不歸

龍沙晚行

晚風度疎松琳琅動仙闕迴波滾明沙錯認地上月

聞夜笛

五月梅花落羈魂
羌笛驚孰能風月夜
更聽隴頭清
龍沙見新月

每訝沙如月
龍蟠作後山
如何今夜月
却又學沙彎
村夜

萬物既有息
我亦中林卧
雲開迴水白
地閃飛星過
其二

清林不知暑
一覺羣雞鳴
野曠氣森飈
天空夜虛明

其三

霞明鳥聲起行人語中路微微
林下風泫泫花上露

晚燒吟

早燒不出門晚燒行千里
達人貴知時天道有終始

黃河水

黃河一夜冰日光慘不發安得萬里鞭
白馬弄晴雪

其二

夜冰白莽莽風來但飛沙
梁園一夜雪枯樹皆梅花

宿蘇門

朝發陽武城暮宿蘇門里
卧聽青山鐘遙在白雲裏
是夜雨

北風吹山雲不見山上月
蘇門一夜雨千峰盡成雪

泉上獨酌

湧金亭畔路細雨不思迴
獨酌看流水山花映酒杯

其二

白石誰家瀨輕鷗二月湍
踏歌逢衛女風景似長干

黃州

浩浩長江水黃州那箇邊
岸迴山一轉船到堞樓前

其二

日落清江遠光搖赤壁山
無人說吳魏來往釣舟閒

鄱陽歌

漢水亦太急江渾只恁流
何如彭蠡澤清瑩解人愁

雙泉寺題壁

寺僻無人行夜雨長秋草
山僧出迎客落葉不曾掃

其二

我管寺中遊題詩在東壁三年不見僧見之頭半白

書院

書院今人蹟繁臺古代名樓花畚入燕塔樹不巢鶯

白塔寺

遙訪青蓮宇相將白塔原春風亦自動爭奈碧莎繁

上方寺

飲罷塔廊坐塔深蘿葉垂欲枕石頭卧時有清風吹

釣臺

終日釣石坐清波
閒我鈎擲竿望山月
回見衆魚游

白鹿洞

白鹿簪成羣鹿去
誰復來樵子暮行下
洞中雲自開

聖澤泉

嘈嘈鳴山泉日日噴
悲壑日照一匹練
空中萬珠落

枕流橋

峽急豈有心臨橋石
相激騫驚橋上聽
夕陽人獨立

風雲石

倚崖坐孤石北對五老峰中有千尺虹挂斷巖上松

門前溪

山溪信清淺入海作洪波果向地中轉應隨天上河

迴流山

登山眺四極一坐日每夕行看夜來逕苔上有鹿跡

井

新穿崖下井微霞映深靜松風時來拂娜娜匡岳影

開先寺

瀑峽生煙暝山杯坐不歸
籠燈過潭水疑有玉龍飛

其二

潭色何所似黛玉空人心
可道清見底龍蟠不在深

其三

瀑布半天上飛響落人間
莫言此潭小搖動匡廬山

其四

垂垂千仞瀑隨風下山去
吹作半天雨飄散不知處

其五

飛瀑湧寒峽流雲靜幽壑夕日倒峰影杯中雙劍落
宿開先寺

僧閣暮鐘靜夏涼風色幽月出照瀑布猿啼西澗流
歸宗寺王右軍故居

夕日照何寺夏雷喧此峰惆悵替人去空餘山澗松
吳溪

三年作楚客五月度吳溪日射桃花嶺松陰鷓鴣啼

望龜峰

龜峰歸遇雨徹夜鳴不歇起望昨遊處惟見滿山雪

江行雜詩

十八灘都盡舟人慣不勞可言灘石險難測是平濤

其二

仄壘中江石衝濤萬古存遙看疑砥柱偶問識銅盆

其三

日月東西照支江南北流鷺飛如導鷁橫吹不驚鷗

其四

迎送山相似舟移迷北南
回看阜口日已照石華潭

其五

錫洲潭古怪攸鎮驛幽絕
四圍青山映鷺棲滿林雪

其六

日出青蘋濕江渾路不分
昨宵驅雨至知是海南雲

其七

落日沒前灘雲移鳥欲還
除巾不即卧恐遇絕奇山

新莊漫興

昨來杏花紅今來棟花赤一花復一花坐見歲年易

其二

出城每自醉斜陽坐芳草黃鸝枝上鳴花落有風掃

其三

逕樹團成蓋原草綠如翦盈盈車馬客時來弄春醖

其四

未有此莊時對酒無處飲今來莊上遊却恨酒杯緊

紫霞洞主歌

朝霞弄海色閃爍如金蛇
回光照巖洞駕我青鸞車

其二

雲洞窈窕行覓石髓食
麩麩古苔上有書字不識

其三

丹霞熨朝旭桂葉一何芾
中有騎鶴人下上隨雲氣

其四

朝餐赤城氣暮攬羅浮色
常有瑤草花寒至不曾識

其五

石泉嫋長蘿，煙翠滿山室。忽聞空中音，幽人弄瑤瑟。

田園詩

暑日郊出頻，野意差有適。鴉雀間繁陰，榴葵乃炎赤。

其二

初日暑力薄，單車歷城曲。隍颺卷蜻蜒，荇帶舒復促。

其三

掘塹不數尺，及泉水忽湧。誰為辦佳藕，我今畜魚種。

其四

淤泥獲拳卵蛇龍誰即分
夜看置頓處似有五色雲

其五

園荒蒿藿長手鋤薙其穢
那解蒼蔚區中有吐芳蕙

寄徐子

紫閣朝回夜金尊月映空
祇應徐進士遙憶李郎中

其二

東省堂前樹南陽宅裏花
春風如往日夜月向誰家

贈何舍人

朝逢康王城暮送大堤口相對無一言含悽各分手

寄都主事穆

江草喚愁生思君黃鳥鳴遙心將夜月同滿闔閭城

送余客

自寄還家信閨人數月圓住近沙溪口終日問來船

送人

頗訝楓林赤無風葉自鳴來人與歸客同聽不同情

贈客

出郭江南望暮天
雲北飛斷蓬寒更轉
長路幾人歸
過夏口寄惲君

君居楚城裏我傍楚城過
相思連夜發無奈是江波
諸公石頭口舟餞

北巡察宋合舟餞
此江浚晚別隔煙浦猶聞橫吹音
寄黃子廣東

昨遊梅嶺畔翹望嶺南雲
恰屬梅黃日何由攀贈君

潯陽寄耿叅政致仕

連年卑濕地無日不思歸
况在潯陽見君帆獨北飛

送鄭生

桃花浪初起三月爾江南
萬樹垂楊色相留照暮酣

送人赴舉

寶劍動連星金鞍別馬鳴
持將五色筆奪取錦標名

贈王左史

林卧每倦出時或一乘馬來訪
王相國醉歸月明下

其二

君家百甕酒留連
胡不飲花月我自來
醉即花間寢
贈劉東

洎濱三月時花滿
扶亭道翩翩白馬歸
青袍亂芳草
戲鄭生求歐帖看

徽州鄭季子動輒
古人師昨特衝秋雨
因來問墨碑
送酒鄭生

旅食沙林暮年華
北雁春誰憐竹葉餉
同是采薇人

送王生北行

紫轡銀鞍馬青袍
白面郎揚鞭萬里去
謁帝入明光

其二

朝散午門西
春風起御堤
上林花半發
幾處早鶯啼
觀袁永之樂府戲裁子夜歌寄之

為問閭門柳
年來青若何
館娃明月夜
醉擁越兒歌
其二

日暖春波綠
湖平一鏡天
船船載歌舞
爭向綠楊邊

詠李花

城東萬李樹此樹獨鮮奇
竟日風開落無人誰得知

詠鷺

獨立娟娟鷺驚人離石磯
遙看一片雪深映碧山飛

獲麕

小鹿何山得出山今幾時
笑爾深藏晚無言獵者知

饋雁

失却風雲翅來遊君子門
未辭戈客慕終荷主人恩

花鴨

花鴨靜雲衣
娟娟春草依
臨池捩頸卧
夢拂楚雲飛

鶯曉

睨皖夢中迷
流鶯碧樹西
起來紅日照
已度別枝啼

詠螢

葉暗輝輝度
孤明炯自知
月臨光不掩
星亂影須疑

名花

名花似美人
娉婷代應絕
夕陽時獨立
風起滿林雪

炭簍盆架

以下八首詠
獄中雜物

編荆為團籠本以貯木炭今匪用炭時聊以助吾盥

砂鍋盆

砂鍋注清冷洗面還洗心其器苟不潔徒稱玉與金

船板牀

船板胡在茲而我寢其上情知非江湖夢寐亦風浪

甌枕

盧生枕竅中哀樂竟何用我枕城甌卧無竅亦無夢

蘆蓆几

古人席地坐飲食俱在茲今人設高几翻謂古人卑

坏墩

晨興坐茲譚而亦坐茲食為言同寓子尚念埴者力

麻繩橛

何以架我衣麻繩撐兩柱諒有解脫心與子同一處

葛衫帳

酷暑睡不穩解衫周四圍但阻蚊蟲入無遮明月輝

漁村夕照

以下八首
詠瀟湘

西暘下洞庭網集清潭上一丈黃金鱗可見不可網

山寺晚鐘

美人杳何處盈盈隔秋水遙遙雲外鐘日落暮山紫

平沙落雁

西風萬里雁一葉洞庭秋羣浴金沙軟瀟湘霜氣流

江天暮雪

長江浪滾雪煙黑花爭飛可怪橫流者孤舟一笠歸

洞庭秋月

天水本自空圓月
況秋映晶晶起霜色
千里一懸鏡
瀟湘夜雨

夜響起秋竹
浩浩楚雲白
曉來看沙觜
新水添一尺
遠浦歸帆

秋風五兩席
點點聚復散
不信小小鳥
飛飛速征雁
山市晴嵐

峰晴堆夜嵐
晨炊翠猶濕
但聞山鳥鳴
不見鳥出入

薜荔園

以下十四首詠徐學士園

芳園薜荔水石非人間
簪聞西洞庭今為學士山

恩樂堂

肯堂欽古訓修祀報前功
酌河歌行潦采蘩遵召風

石假山

磊竒成我山雲氣遽裊裊
衣水即溟渤拳石是蓬島

水鑑樓

風吹池萍開天空水如鏡
幽人時凭闌下看行雲影

風竹軒

吾軒自有竹暑月常寒聲山靜無風時滿林空翠生

蕉石亭

看石忽有詩攀蕉書其上夜來雨打葉驚聞金石響

觀畊臺

洞庭有興雲太湖無落波登臺問農者不勤將如何

薔薇洞

洞口薔薇密石花壓雲濕曉采枝上露不知鶴飛出

荷池

山風吹水香脫巾池上坐盈盈千歲龜飛上荷葉卧

柏屏

堂堂千尺材為屏忍屈曲終抱凌雲情不改歲寒綠

留月峰

峰竒自成竅似月非有心月來爾何意徘徊光與深

通泠橋

雨過崖水響石梁裊山澗晴天挂一虹溪斷雲不斷

花源

落英泛流水，點點如飄霞。
為有問津者，不敢種桃花。

釣磯

磯根浸寒水，細草綠如髮。
夜魚不受餌，石上坐秋月。

空同集卷三十四

欽定四庫全書蒼要卷一萬六千九百二十六

集部

空同集卷三十五

明 李夢陽 撰

七言絕句一

正德元年郊祀歌十首

戈馬喧喧動萬雷
黃旗繞繞拂仙臺
天上再開新日月
南郊不改舊蓬萊

其二

漢家天子自天威
春祀南郊春雪圍
片片瓊花飄玉路
五雲偏逐袞龍飛

其三

壇官秉笏候金鐘
月出西南照雪峯
不向蓬萊看五色
那知天子是真龍

其四

中壇日月照天門
上帝龍行羽衛屯
烟裏桂花旋玉兔
火開三足抱金盆

其五

外壇羅列黃金榜
海嶽齊開白石門
直使衡山馳薊域
更看西海過崑崙

其六

神來擊鼓復吹簧
一道虹飛萬丈光
闔闔清風搖玉燭
至尊獨立殿中央

其七

帝是高皇八葉孫
隆準龍顏稱去聲
至尊翠羽繽紛來衆

聖洋洋古樂亂雲門

其八

漢主登封巨跡空赭山秦帝洞庭中何如黍稷天神享
萬歲高高太極宮

其九

天馬元從天上落七星裝入寶刀頭壇空月照更衣殿
萬錦羣中刷紫騮

其十

金輿還內放人看萬戶千門震地懽繡扇徐開龍虎氣
君身不動泰山安

帝京篇十首

古時灞水即盧溝今代車書似水流日間五色龍文氣
天上春開五鳳樓

其二

漁陽北塞古風沙二月春風萬柳斜薊門轉作長安苑
燕桃開出武陵花

其三

慷慨燕雲十六州天門北極帝星頭胡塵一洗桑乾淨
萬載朝宗四海流

其四

山作青龍左右盤扶桑西影拂桑乾日月光華朝萬國
天留北海作長安

其五

天皇按劔據金鞍飲馬追胡瀚海乾歸來並立擎天柱

不數劉家承露盤

其六

胡后粧樓換上陽
春風珠箔舞垂楊
半夜開城歸萬馬
至今迷失幾鴛鴦

其七

今朝望海海雲生
五色雲中白玉城
金陵巧接盤龍勢
南北何如漢二京

其八

塞上星飛化羽林鼓音咸作管簫音將軍把劔聞雞舞
玉女朱樓學鳳吟

其九

高鼻胡奴入漢闕皂旗千隊射鵬還君看萬古昏星月
洗出中華疊翠山

其十

自從黃帝破蚩尤涿鹿雲黃黑帝愁盤石果然為碣石
幽州常作帝王州

皇陵歌

皇陵疊翠倚丹青
絳節飛光夜夜朝
千古長風吹海月
萬山松柏照空寥

傳聞駕回有紀二首

正德年
間作

正月傳聞大駕還
七日已度居庸關
饒歌擬續之回曲
塞外應添駐蹕山

其二

白城新起望夷臺
黃鉞森森耀日開
六驃遠遁胡沙靜

六龍騰踏駕空回

聖節聞駕出塞

千官北首望龍旂萬國車書集鳳闈八駿穆王秋色遠
幾時親擁白狼歸

其二

萬乘時巡萬壽臨鑾輿漠漠磧沙深非忘殿闕呼嵩日
應繫單于款塞心

正德七年正月黃河清自清河至於柳家浦九

十里清五日馬

黃河水自崑崙出萬古東流元不清今瑞定於今帝應
世人休擬聖人生

嘉靖元年歌

元年正月又王春四海人稱拱聖人已報岐山鳴彩鳳
更傳闕內出麒麟

其二

大明十帝轉神明天意分明賜太平紫蓋復從嘉靖始

黃河先為聖人清

先是正德七年九年黃河連清今上入繼大統之兆

送樂清少府

羽騎駉驪簇晚洲
彭彭簫鼓引官舟
為言獨對青松樹
何似逢迎綠水頭

其二

鴈蕩山前海色開
樂清城在白雲隈
紅桃碧柳津津勝
笑舞歡歌處處來

贈黃州牧

黃州江比使君清赤壁山留萬古名黃州小兒騎竹馬
來時相送去時迎

送友人

王孫笑向碧山樓春日春蘿裊裊低予亦悠悠芳草者
白雲愁色草萋萋

送周判官

明鐙綠酒五花裘客舍新秋螢火流商君不飲真何事
明日出城風葉愁

送人入蜀

錦江風高生夕波
蘆荻蕭蕭秋鴈多
問爾鄉關何處是
巴人時唱下渝歌

詠東方朔贈馬吏部

據地酣歌金馬門
如花少女笑無言
不是偷桃太無那
人間那謫歲星魂

王吏部惠太玄戲贈

吾家小子象童烏
蒙惠太玄文掌上
珠笑殺街西王吏部

今朝猶得酒船無

月夜過訪王子

率爾高陽飲博徒
酣歌擊劍膽何麤
金門貴客如相許
徑脫鸛裘付酒壚

僕思李白落鴈之遊
徐子亦有知章鑑湖之請
念人悲離申此短贈
徐子者禎卿也

君擬天台度石梁
我歸沙苑望咸陽
予今夢寐蓮華岳
笑爾翻耽瀑布長

嘲陸子二首

松江陸子以予久不造過遂蒙嘲詠然陸子往許
以小楷南征賦貺我久亦恠焉予故得反嘲戲之
兼訊後約焉

甚欲來餐張翰魚只緣難換會稽書西家愚夫莫浪謔
北海先生久索居

其二

我今四海覓雲松南遊笑指匡廬峰他時倘慕金光草

與爾同鞭赤玉龍

晚過序公戲贈并喜徐編修縉迹訪二首

月滿長安啼暮鴉
踏歌今夜醉誰家
青蓮大士迎予笑
背指秋鶯度落花

其二

長安大道竹林西
李白尋僧花下迷
舉杯恰對青天月
檻外驚傳碧玉蹄

夏口夜泊別友人

黃鶴樓前日欲低
漢陽城樹亂烏啼
孤舟夜泊東遊客
恨殺長江不向西

寄贈珙縣何氏夫婦

太峨西來通蜀門
瀘江北接武陵源
翁姑壽比江山永

縣北芙蓉似子孫

芙蓉山名

謝子饋笏答以駝布

交州象簡白雲光
美人持贈意何長
洮西駝布雖微細
被服能堪冷月霜

送王呈貢赴縣

二月扁舟過浙西
楚雲何日度
浯溪滇南小郭
青山繞
花發流鶯一樣啼

寄錢戶部

春城雞啼月欲沒
西鴈東飛遲
明發風裏楊花不定飛
震澤迢迢限吳越

酬姚員外龍興見寄

龍興龍沙一里餘
江風吹落錦雙魚
君覽浙潮須盡海

赤霞飛袂過匡廬

贈丁生

海涼秋水淨芙蓉
青天倒懸五老峰
眼見排風生羽翼
行空那辨有真龍

別達生

醉約金山看海流
興飛江漢忽西遊
龍沙月色年年滿
獨照匡廬萬仞秋

寄別陶生

青雲峰下紫雲生中有花樹春鳥鳴聽鳥看雲一杯酒
黃塵回首萬家城

別李生

華也南來送我行青絲挈酒玉壺輕滕王閣下江千尺
一曲滄浪萬古情

贈鮑激兄弟

水學青龍左右盤玉流雙瀉碧光寒蘭昆並占空山月
分掣虹霓作釣竿

贈劉君按察雲南

碧雞金馬古黔陽
滇海秋搖日月光
自此蠻中無毒熱
行臺六月有飛霜

送蕭總制赴鎮

漢家新拜霍嫖姚
司馬今年相宋朝
旌旗一舉三邊靜
鴈塞平沙演射鷗

送修武知縣

青山盤谷繞桑麻
赤水河陽接種花
琴罷吏希簾晝捲

自看雙柏哺慈鴉

贈李沔陽

雲夢茫茫繞一州
滔滔江漢古今流
問俗不須乘五馬
畫船簫鼓水鄉遊

其二

楚人抽棘霸江湖
萬載孤城剖一符
從此沔陽為渤海
直教雲夢作蓬壺

寄郭帥

匡廬彭蠡兩蒼蒼
月館花城古豫章
誰信罷兵張宴地
夜深偏醉郭汾陽

寄謝卿

擲笏南還尚黑頭
移家西郭興全幽
春晴定上滕王閣
日暮江平起白鷗

贈陳氏

萬龍岡上古靈家
男樂耕耘女績麻
客到大開萱草閣
春風時動紫荊花

贈蔡帥

時清晝卧銅牙
弩客散宵披玉檢文
可道將軍渾是武
曾將三策獻明君

送王韜

王郎口談金虎文
自稱師是紫陽君
挂帆明月忽南去
影落龍江五色雲

贈羅氏

羅隱北下黃金臺
牡丹芍藥次第開
極目長江渺天際

八閩秋盡一帆迴

送熊進士入朝

武帝南征並海迴九天雲罕拂天來縹緲羣仙朝絳節
五雲宮闕是蓬萊

其二

蒼蒼玄武鎮皇州天上銀河轉地流言君不是乘槎者
昨夜分明到斗牛

其三

金馬宮堯接鳳臺石渠高閣倚天開
仲舒早備天人策
漢主臨軒問自裁

二月望丘翁林亭

今日花朝好風日
梁園酒新花更開
走覓南鄰丘處士
月明騎馬醉深迴

其二

南鄰處士閉柴門
竹樹春風野徑昏
痛飲狂歌人不識
客來惟欲酒盈樽

東鄭生

東園紅杏日紛紛東望無煙蝶滿雲
少出違期因怯馬獨吟停盞為思君

其二

城門春禁不行車病懼攀鞍只在家
昨日東風來著意庭前忽放數枝花

雨俟屠君不至

暮倚高樓因候客雨來如注復如絲
試看春日洪州道

可是山陰夜雪時

寄顧台州

中山何似峴山遊
雲島長和海色幽
定有兒童笑山簡
君今孰與鄭台州

其二

怪爾分符坐赤城
東南遙見海霞生
梅開莫寄西來使
春到煩求碧玉精

太白山人仙遊吳越稔矣日者卜居吳興而婚

施氏妻妹予聞之輒詩嘲焉

范子無端出五湖西施並載有耶無詩人只合鶯鶯伴
施家今是大姨夫

其二

見說仙人萼綠華

萼綠華晉昇平中降羊權家

麻姑亦降蔡經家即

防獅子河中吼背癢無言爪得爬

雲中曲送人十首

壯士驅車出漢關馬頭絲絡紫金環莽莽黃雲迷代北

淒淒白霧滿燕山

其二

季冬飲馬長城窟
沙礫飛揚帶白骨
榆臺嶺邊聞鬼啼
猶是今年戰亡卒

其三

黑帽健兒黃貉裘
匹馬追胡紫塞頭
相逢不肯通名姓
但稱家住古雲州

其四

城上黃旗張暮天元戎宅內鼓闐闐底是鄰悲并巷哭
雲州明日是新年

其五

紫水東來入黑河紇干山下雪花多小兒攔街吹簾篋
婦人能唱海西歌

其六

白登山寒低朔雲野馬黃羊各一羣冒頓曾圍漢天子
胡兒惟說李將軍

其七

自從虜逼鴈門關
漢家四野多空壘
行子遙遙看獨戍
桑乾水冰暮沙起

其八

黃毛愛子出打圍
昏宿李陵古臺下
忽傳風火入邊城
城中將軍夜秣馬

其九

戰士黃鬚立道傍
自言曾射左賢王
可憐孤績無人論

贈與青裘白馬郎

其十

北風吹日馬毛僵腰間角弓不可張憑君莫唱雲中曲
臘月雲中更斷腸

對菊懷鄰菊子三首

巳巳年
閏月

舊種寒株傍吹臺重陽今歲不曾開遙思爛漫還憐汝
欲比馨香恐見猜

其二

睡起今晨看菊花
霜枝冷蘂忽參差
非時未必輸桃李
三徑遙憐是一家

其三

爾家堂閣皆隣菊
秋至滿地黃金錢
不信南州能暑熱
直將花蘂破霜天

送吳生

吳子乘春東入吳
飛花獻舞鳥提壺
此去囑君多載酒
直收春色過西湖

東園贈鮑演

修竹南牕花北牕翠陰濃色兩無雙
隔城走馬催銀燭
今夜留君倒玉缸

春日東莊要杭子

白首春風獨種瓜
故人常恨隔天涯
今游莫憚騶行遠
十里柴門有杏花

東雙溪方伯

十旬不見雙溪子
白晝看松只自眠
君對紫薇誰是伴

相逢還似未逢前

送人之南郡三首

梁園千古見風流
醉上任樓復謝樓
相遇片言心便倒
腰間含笑解吳鉤

其二

鼓刀朱亥本微寒
白首侯嬴是抱關
不為千金增意氣
祇緣一諾重丘山

其三

南陽帝里近親多岡勢盤龍繞白河便欲臨分留寶劍
方城漢水待鳴珂

陶子見過草亭遂以留雲名之大書刻木我亭
增色爰賦二詩酬陶亦兼自意

小構茅亭傍一松雲來雲去寂無蹤晴天戶牖濛濛濕
遂使人疑有卧龍

其二

茅亭自得陶公筆盡日光芒動白虹山澤不煩通地氣

片雲時起墨花中

春日宴王孫之第二首

紫宮華宴敞春風
密樹初花日映紅
向暮酒闌香不斷
始知春在綺羅中

其二

迴廊曲榭稱春游
綠酒紅花白玉甌
借取遊絲繫西日
晚風吾上海棠樓

要謝憲使南莊泛舟

柳塢荷塘野意寬
操舟曳杖獨遊難
春來欲製東山屐
倘許花樽共謝安

江上逢鄭南溟

楊子灣頭紅蓼秋
水邊樓閣樹邊舟
一日長風破萬里
為君三醉過瓜洲

白鼻騮

羽箭銀鞍白鼻騮
春日徐行踏落花
揚鞭突入章臺去
背指垂楊問酒家

少年行

漁陽突騎幽并兒，彎弓射獵南山陲。
橫行未遂為人下，意氣憑何結主知。

春遊曲

騮馬銀鞍金市頭，都門掣電落花流。
揚鞭笑指胡姬肆，轉拂垂楊向玉樓。

其二

大道紅樓珠箔垂，風起楊花欲暮時。
胡姬半醉半遮面。

惱殺幽州遊冶兒

絕句

將軍鐵騎戰金微
八月長安盡搗衣
砧聲欲落三更月
翡翠樓頭鴈却飛

壽歌

沙溪三月杜蘭香
錦浪千層碧玉光
勝日賓筵開玳瑁
檻花飛入萬年觴

其二

門對黃山第幾峰
翩翩白鶴舞青松
玉童來授軒轅訣
素女邊乘赤色龍

松鶴壽歌

松裊石門千仞開
天風吹鶴下瑤臺
傳書為問西王母
別後蟠桃熟幾迴

夷門十月歌

小麥青青水半陂
半落不落楊柳枝
回風忽送天南鴈
恰似春江二月時

黃河風雪詞

渺渺黃河風雪生
雲愁海思不堪行
陽春白雪非難和
公無渡河無限情

異景

異鄉異景客中身
秋雨秋煙無那春
梁園八月如三月
笑殺桃花更笑人

暮春余莊

暇即來遊困即眠
玉林長醉彩雲前
春風暮起楊花亂

疑是梁園雪裏天

潯陽歌

百尺高樓橫映江
江花朵朵照成雙
風波隔浦遙相喚
腸斷南來北去艖

汴中元夕五首

花燭沈沈動玉樓
月明春女大堤游
空中騎吹名王過
散落天聲滿汴州

其二

玉館朱城柳陌斜
宋京燈月散煙花
門外香車若流水
不知青鳥向誰家

其三

中山孺子倚新粧
鄭女燕姬獨擅場
齊唱憲王春樂府
金梁橋外月如霜

其四

四海煙花逢上元
中州行樂競千門
大江不辨魚龍戲
珊瑚寶玦是王孫

其五

細雨春燈夜色新
酒樓花市不勝春
和風欲動千門月
醉殺東西南北人

七夕

雲寂露涼叢蕙悲
意銜情恨隔年期
殘機夜歇金螢度
怨女啼春玉箸垂

獄雨


冷雨橫天八月來
黑雲來往赤雲開
潯陽李白何如此

宋玉悲秋未是哀

其二

雨打潮門流海煙
隨風散落鳳城前
愚臣獨抱枯魚泣
何日金鷄下九天

空同集卷三十五



總校官庶吉士臣侍朝

校對官編修臣閔懋大

校對官檢討臣龔大萬

謄錄監生臣吳錫綵

謄錄監生臣張子誠